

Erindisbréf skipulagsnefndar

Sveitarfélagsins Hornafjarðar

Stjórnskipuleg staða

Skipulagsnefnd Sveitarfélagsins Hornafjarðar heyrir beint undir bæjarstjórn. Starfsmaður nefndarinnar er skipulags- og byggingafulltrúi sveitarfélagsins.

Skipan, seturéttur á fundum og áheyrnaraðild

Í skipulagsnefnd eiga sæti fimm fulltrúar kosnir af bæjarstjórn að afloknum sveitarstjórnarkosningum skv. ákvæðumsveitarstjórnarlaga nr. 138/2011. Bæjarstjórn kýs nefndinni formann og varaformann og hverjum aðalmanni er jafnframt kosinn varamaður. Hafi tveir eða fleiri flokkar eða framboðslistar haft samstarf um kosningu í nefndina, skal sá sem tilnefndi viðkomandi aðalman einnig tilnefna varamann hans, nema öðruvísi hafi verið ákveðið í yfirlýsingu skv. 2. mgr. 24. gr. sveitarstjórnarlaga.

Kjörtímabil skipulagsnefndar er hið sama og bæjarstjórnar. Auk kjörinna fulltrúa eiga bæjarstjóri og starfsmaður nefndarinnar rétt til fundarsetu með málfrelsi og tillögurétti. Þá er heimilt að kalla til á fundi nefndarinnar sérhvern þann er tengist málum sem fjallað er um hverju sinni. Starfsmönnum stofnana bæjarins er skylt að sitja fundi nefndarinnar sé þess óskað.

Hlutverk og verksvið

Meginhlutverk skipulagsnefndar er að móta stefnu varðandi skipulagsmál. Nefndin fer jafnframt með lögbundið hlutverk skipulagsnefndar.

Meðal verkefna nefndarinnar er:

- Að vera bæjarstjórn til ráðgjafar og veita umsögn um erindi á verksviði nefndarinnar
- Að fylgjast með framkvæmd laga og reglugerða er snerta starfssvið nefndarinnar
- Að gera tillögur að verkefnum í tengslum við fjárhagsáætlunargerð til bæjarráðs
- Að hafa forgöngu um gerð skipulagstillagna og fjalla um þær tillögur og athugasemdir sem nefndinni berast
- Að gera tillögur til bæjarstjórnar um gjaldtöku vegna gjaldskyldrar starfsemi sem heyrir undir verksvið nefndarinnar

- Að fjalla um umsóknir um leyfi til verklegra framkvæmda
- Að hafa umsjón með því að skipulagsákvæði séu haldin
- Að vera bæjarstjórn til ráðgjafar og veita umsögn um erindi sem tengjast samgöngumálum
- Að vinna að bættu skipulagi umferðamála
- Að fjalla um og kynna stefnumótun opinberra aðila í samgöngumálum

Að fjalla um önnur þau mál sem bæjarstjórn og bæjarráð felur henni.

Starfshættir

Um starfshætti undirnefnda Bæjarstjórnar Hornafjarðar er fjallað í VI. kafla í *Samþykkt um stjórn og fundarsköp Sveitarfélagsins Hornafjarðar* og skal ákvæðum kaflans fylgt eftir því sem við á.

Nefndin kemur saman á fastákveðnum fundartíma einu sinni í mánuði og stýrir formaður fundi. Skal gerð samþykkt um þennan fundartíma á fyrsta fundi að fenginni tillögu bæjarstjóra. Boðað skal til aukafunda að ákvörðun formanns eða ef a.m.k. tveir nefndarmanna óska þess. Heimilt er að fella niður fundi að summarlagi og á öðrum tímum að mati formanns. Nefndin getur auglýst einstaka fundi sína opna, en annars verður stjórnin að samþykkja viðveru hvers þess sem ekki á seturétt á fundinum.

Þá getur nefndin staðið fyrir kynningarfundum vegna starfa sinna eða þeirra verkefna sem til umfjöllunar eru, og skulu slíkir fundir öllum opnir.

Starfsmaður nefndarinnar sér um að taka á móti erindum og málum sem leggja á fyrir nefndina. Hann útbýr í samráði við formann rafrænt fundarboð þar sem tilgreindur er fundarstaður og tími ásamt dagskrá í tölusettum liðum. Fundarboð skal sent öllum aðalmönnum, varamönnum og öðrum sem seturétt eiga á fundum nefndarinnar.

Starfsmaður kemur undirritaðri fundargerð til starfsmanna stjórnsýslu sem sjá um að fundargerð sé lögð fram með dagskrá næsta fundar í bæjarráði sveitarfélagsins.

Ályktanir til bæjarstjórnar og bæjarráðs skulu ætíð sendar bæjarstjóra í sérstöku erindi. Nefndarmenn skulu fá hæfilega þóknun úr bæjarsjóði fyrir störf sín samkvæmt nánari ákvörðun bæjarstjórnar.

Afgreiðsla mála

Samþykktum, reglugerðum og gjaldskráum sem hljóta eiga staðfestingu ráðherra skal vísað til bæjarstjórnar, ásamt afgreiðslu erinda sem kveðið er á um í skipulagslögum nr. 123/2010 og samþykkt um afgreiðslu erinda.

Eftirfylgni

Nefndin og starfsmaður hennar, hafa með höndum framkvæmd þeirrar stefnu sem mótuð hefur verið á hverjum tíma varðandi málefni skipulags- og byggingarmála. Formaður og aðrir nefndarmenn skulu snúa sér til bæjarstjóra til að fylgja eftir þeim ákvörðunum og samþykktum sem ekki eru alfarið á verksviði nefndarinnar að framfylgja.

Réttindi og skyldur nefndarmanna

Um réttindi og skyldur nefndarmanna gilda ákvæði *Sveitarstjórnarlaga* og *Samþykktar um stjórn og fundarsköp Sveitarfélagsins Hornafjarðar*.

Lög og reglugerðir

Í störfum sínum skal nefndin taka mið af þeim lögum og reglugerðum sem snerta starfssvið hennar.

Þá skal nefndin fylgja *Samþykkt um stjórn og fundarsköp Sveitarfélagsins Hornafjarðar*.

Samþykkt í bæjarstjórn 9. mars 2015

Björn Ingi Jónsson
Bæjarstjóri